

UPA 2018-imi saqqummiunneqartussamik utoqqalinersiallit siusinaartumillu sulisinnaajunnaarnersiutillit saniatigut sulisarnerminni pisartakkaminnik ilanngaaffigitittarunnaarnissaata kinguneqaataanik Naalakkersuisut misissuinissamik peqquneqarnissaat pillugu Inatsisartut aalajangiiffissaattut siunnersuut.  
(*Inatsisartunut Ilaasortamit, Villy Olsvigimit, Inuit Ataqtigiit, saqqummiunneqartoq*)

pillugu

## **Ilaqtariinnermut Peqqissutsimullu Ataatsimiititaliap**

### **siunnersuutip aappassaaneerneqarneranut**

### **ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Martha Lund Olsen, Siumut, siulittaasoq  
Inatsisartunut ilaasortaq Mala Høy Kuko, Atassut, siulittaasup tullia  
Inatsisartunut ilaasortaq Jess Svane, Siumut  
Inatsisartunut ilaasortaq Laura Tàunâjik, Siumut  
Inatsisartunut ilaasortaq Debora Kleist, Inuit Ataqtigiit  
Inatsisartunut ilaasortaq Mimi Karlsen, Inuit Ataqtigiit  
Inatsisartunut ilaasortaq Kelly Berthelsen, Inuit Ataqtigiit

UPA 2017-ip nalaanni ulloq 22. maj 2017-imi siullermeerinninnerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Saniatigut isertitaqarnerup kingunerisaanik utoqqalinersiat siusinaartumillu soraarnerussutisiat ilanngaaffigitittarunnaarnissaat qanoq kinguneqarsinnaanersoq misissorneqassasoq siunnersuuteqartup kissaatigaa. Misissuineq kingusinnerpaamik UPA 2018-imi saqqummiunneqassaaq.

Saniatigut isertitaqarnerup kingunerisaanik soraarnerussutisiat ilanngaaffigineqartarunnaarpata isumaginninnikkut inatsisinut allanut attuumassuteqartunut tamanna ajornartorsiutinik naapertuutinngitsunik nassataqarsinnaanersoq misissuinermi ilanngullugu qulaajarneqassasoq siunnersuummut tunngavilersuutimini siunnersuuteqartup oqaatigaa. Utoqqalinersiallit siusinaartumillu soraarnerussutisiallit sapinngisamik

sivisunerpaamik suliffeqartarnissaat akileraarutaasalu inuiaqatigiinni nalilimmik aamma pilersitsinissaat siunnersuuteqartup kissaatigaa.

### **Siunnersuutip Inatsisartunit siullermeerneqarnera**

Misissuinissap kissaatigineqartup ingerlanneqarnissaa siullermeerinermi tapersorsorneqarpoq. Utoqqalinersianut tapit ilanngaaffigitittarnermullu killigititap iluarsivigineqarnissaat kissaatigineqartoq siullermeerinermi aamma saqqummiunneqarpoq, taamaalilluni utoqqalinersiat minnerunngitsumillu utoqqalinersialinnut tapit annikillisaaviginnginnerini annertunerusumik isertitaqartoqarsinnaaniassammat.

Pisortat isumaginninnikkut ikiorsiissutit akornanni ajornartorsiutinik pilertoqarsinnaanera ataatsimut isigalugu siullermeerinermi eqqumaffigineqarpoq. Utoqqalinersiat pillugit malittarisassat pingaernerit akornanni naapertuutinnngitsumik akerleriittoqarsinnaanera siullermeerinermi ilanngullugu sammineqarpoq. Illuatungaaticullu utoqqaat piumassusertik pisinnaanertillu naapertorlugit sulisinnaanissaat kissaatigineqarpoq, utoqqalinersialli pillugit malittarisassat isumaginninnikkullu maleruagassat allat akerlianik taama siunertaqarnermut piumassuseerutsitsisinnaapput. Illuatungaaticut soraarnerussutisiallit sulinissamut aammalu imminut pilersorlunilu inuiaqatigiinnut pilersueqataanissamut kajumissaarneqarput, illuatungaaticullu pineqartut atukkatigut ajunngitsorsiassaasa ilaannik inuiaqatigiit arsaartuillutik.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami suliarineqartussanngorlugu innersuunneqarpoq.

### **Ataatsimiititaliap siunnersuummik suliarinninnera**

#### **Utoqqalinersialinnut siusinaartumillu soraarnerussutisialinnut maleruagassat atuuttut pillugit**

Ataatsimiititaliamit aallarniutigalugu oqaatigineqassaaq utoqqalinersiat siusinaartumillu soraarnerussutisiat isumaginninnikkut tunniuttagaammata piumasaqaatit erseqqinnerusumik aalajangersarneqartut naapertorlugit tunniunneqartartut, taamaaliornikkut soraarnerussutisiallit inuuniarnermikkut atugaasa minnerpaaffissaat qulakkeerneqarsinnaaqullugu.

#### **Utoqqalinersiat pillugit**

Utoqqalinersiaqalernissamut utoqqalisimanissaq soorunami siullertut piumasaqaataavoq. Utoqqalinersiallit ilaat sivisuumik sulisimanermikkut utoqqalinissaminnut katersaqarluarsimanissartik qulakkeernikuugaat utoqqalinersiallit ilaat isertitsissutigisartakkaminnik suliffeqartut, utoqqalinersiaqalersinnaanermut ukiut angoreeraluarlugit.

Utoqqalinersiaqalernissamut malittarisassat atuuttut utoqqalinersiallit sulisinnaasut sulerusuttulluunniit sulinissaannut akornutaanngillat. Tassa utoqqalinersialinnut sulerusuttunut inatsisitigut killilersuisoqanngilaq.

Utoqqalinersiat isumaginninnikkut tunniuttagaammata utoqqalinersialinut allanik isertitalinnut imaluunniit aalajangersimasumik annertussusilimmik isertitalinnik inooqateqartunut ilanngaassisarnermik ullumikkut periuseqarpugut. Isertitat isigineqartarput isertitat A-t aamma B-t, tassaallutillu assersuutigalugu aningaasarsianit isertitat, tjenestemandit soraarnerussutisiaat, piniarnermit sanalukkanillu tunisanit isertitat, ernianit isertitat, suliffeqarnermi soraarnerussutisiat namminerlu soraarnerussutisiassatut katersat. Utoqqalinersiat siusinaartumillu soraarnerussutisiat kiisalu isumaginninnikkut qulakkeerinninnissaq pillugu Nunat Avannarliit Isumaqatigiissutaat naapertorlugu soraarnerussutisiat isertitanut ilanngullugit naatsorsorneqarneq ajorput.

Utoqqalinersiat pillugit malittarisassat ulloq 1. januar 2016-imi atuutilersumik kingullermik annertunerusumik allangortinneqarneranni tunngavik pingaarneq tassaavoq utoqqalinersiat pisortat tunniuttagaat ilannganngikkaluarlugit annertunerusumik isertitaqarsinnaaneq ilaatigut periarfissaalersinneqarmat. Taamaaliornikkut utoqqalinersiallit suliffeqaannarnissaminut kajuminnerulersinneqarnissaat kissaatigineqarpoq.

### **Siusinaartumik soraarnerussutisiat pillugit**

Siusinaartumik soraarnerussutisiallit utoqqalinersialinnut sanilliullutik allaassutigaat ukiut aalajangersimasut tikikkaangamikkut soraarnerussutisiaqalerneq ajornertik. Siusinaartumilli soraarnerussutisiaqalernissamut piunasaqaataavoq timikkut tarnikkulluunniit pissuteqartumik sulisinnaassutsip ataavartumik annikillisimanissaa. Sulisinnaanerup annikillinera tamakkiisumik sulisinnaanermut sanilliullugu procentinngorlugu naatsorsorneqartarpoq. Sulisinnaanerup qanoq annikillisimatiginera aallaavigalugu siusinaartumik soraarnerussutisiaqalersitsisoqartarpoq.

Siusinaartumik soraarnerussutisiat utoqqalinersiat assigalugit isumaginninnikkut tunniuttagaapput. Siusinaartumik soraarnerussutisianik ilanngaaviginnittarneq aamma atuuppoq, tamatumani siusinaartumik soraarnerussutisiallip inooqatigisalluunniit ukiumut katillugit isertitat annerpaaffigisassaat qaangersimappagit siusinaartumik soraarnerussutisiat appaavigineqartarlutik.

Siusinaartumik soraarnerussutisialinnut maleruagassat ulloq 1. juni 2016-imi atuutilersussanngorlugit allangortinneqarneranni siusinaartumik soraarnerussutisiallit sulisinnaassuseqarnermikkut sapinngisamik annertunerpaamik atuinissaat kissaatigineqarpoq, taamaaliornikkut siusinaartumik soraarnerussutisiallit pisortanit pilersorneqaannaqqunagit.

Innuttaasut piginnaasaasa killeqarnerat pinnagu suliffeqarnissamut nukissaasa salliutinneqarnissaat siusinaartumik soraarnerussutisiat pillugit siunnersuummi pingaarnerit ilagaat.

Siusinnerusukkut misissuinerit ilaatigut uppernarsarpaat, siusinaartumik soraarnerussutisiallit ilaat suliffeqaatigalutik tamakkiisumik siusinaartumik soraarnerussutisianik pissarsisartut tamannalu siusinaartumik soraarnerussutisiat pillugit maleruagassani siunertaasimanngisaannarpoq.

### **Misissuinissaq**

Utoqqalinersiat siusinaartumillu soraarnerussutisiat pillugit 2015-imi aaqqissuusseqqinnerit 2016-imi atuutilersinneqartut ilaatigut siunertarineqanngitsumik kinguneqarsimasinnaaneri ataatsimiititaliap eqqunnginnerarsinnaanngilaa, taamaattumik soraarnerussutisiat allanngortinneqarnerisa sunniutaannik kingunerinillu erseqqinnerusumik misissuisoqarnissaa tikilluaqqunarpoq.

Inatsit pineqartoq kissaatigineqartut sunniuteqarsimanersoq naalackersuinikkullu anguniakkat anguneqassanersut ingerlaavartumik eqqumaffigissallugu tunngaviusumik isigalugu pitsaasuvoq.

Inatsisit siunertarineqanngitsumik naapertuutinngitsumillu kinguneqarsimanersut misissuinikkut qulaajarneqartariaqartoq ataatsimiititaliaq isumaqarpoq. Siunnersuuteqartup siunnersuummut tunngavilersuutimini oqaatigisaatut isumaginninnikkut inatsisinut allanut tunngatillugu utoqqalineri siusinaartumillu soraarnerussutisiaqartut pillugit maleruagassani atuuttuni naapertuutinngitsunik ajornartorsiuteqarnerisooq aammalu isumaginninnermut inatsisinut allanut tunngatillugu ilanngaaffigineqartarunnaarneq immikkut ajornartorsiutissaqarlunilu kajumikkunnaarsitsisinnaanersoq misissuineri qulaajassallugit soqutiginaateqassaaq.

Assersuutigalugu ineqarnermut tapiissutinut maleruagassat utoqqalinersiallit isertitaqarnermini atugaannut kalluaanermikkut utoqqalinersiuteqartut suliffeqarnermut attuumassuteqaannarnissaannut utoqqalinersiutit pillugit maleruagassani kajumissaataasunut sanngiillisitsippata imaluunniit utoqqalinersiallit sapinngisamik sivilisunerpaamik suliffeqaannarnissaannut piumassuseerutsitsippata.

Utoqqalinersiat siusinaartumillu soraarnerussutisiat pillugit maleruagassanik kingullermik allanngortitsineri anguniakkanut akerliusumik isumaginninnermut maleruagassat allat sunniuteqarsinnaanerat ataatsimiititaliamit eqqunnginnerarneqarsinnaanngilaaq, tamannalu misissuineri qulaajarneqassasoq ataatsimiititaliamit kissaatigineqarpoq. Saniatigut isertitaqarnermi utoqqalinersiat ilanngaavigineqartanngilluinnarnissaat toqqarneqassappat

meeqqanut tapit pillugit maleruagassat utoqqalinersiat siusinaartumillu soraarnerussutisiat pillugit maleruagassanut sanilliunneqarnissaanni ernumanartoqarsinnaanera siullermeerinninnermi aamma taaneqarpoq.

Utoqqalinersianik pisartagaqalernissamut pisinnaatitaaffimmut tunngatillugu isertitanut killissarititaasoq qaffanneqassagaluarpat imaluunniit piivinneqassagaluarpat inuiaqatigiinnut aningaasaqarnikkullu qanoq naleqarnerulersitsisinnaanersoq misissuinissami annertunerusumik paasinarsisinneqassasoq ataatsimiititaliamit naatsorsuutigineqarpoq. Utoqqalinersiallit siusinaartumillu soraarnerussutisiallit suliffeqarnermut atassuteqaannarnissamut annertunerusumik kajumissaarneqarsinnaappata akileraartarnikkut qanoq isertitaqaataasinnaanera tassunga atatillugu erseqqinnerusumik misissorneqarsinnaasoq ataatsimiititaliaq isumaqarpoq.

Oqaaseq saniatigut isertitat sulinermi aningaasarsiatut, piniarnermit aammalu sanalukkanik assigisaannillu tuniniaanermi isertitatut isigineqartarmata ataatsimiititaliamit tikkuarneqanngitsoorumanngilaq.

Soraarnerussutisiallit isertitaannut killissarititaasut atuuttut isertitalu naatsorsorneqartarnerat soraarnerussutisiallit nunatsinni suliffeqaannarnissaannut kajumissuseqalersinniarlugit taamaalillunilu sulinerisigut inuiaqatigiinni naleqarnerulersitsinissamut soraarnerussutisianut malittarisassat atuuttut qanoq allatut iluarsiivigineqarsinnaaneri pillugit ilisimasanik misissuineq pissarsiviusinnaappat tulluartuussaaq.

### **Siunnersuutip aningaasaqarnikkut kingunerisassai**

Aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunerisassai siunnersuummut tunngavilersuummi allaaserineqassasut Inatsisartut Suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinneqarnerani aningaasatigut kingunerisassai ima nalunaarneqartut ataatsimiititaliap maluginiarpaa: misissuinissaq kissaatigineqartoq 250.000 kr.-it angullugit akeqartussatut naatsorsuutigineqartoq.

Tamanna ataatsimiititaliamit tusaatissatut tiguneqarpoq.

### **Ataatsimiititaliap inassuteqaataa**

Siunnersuut ilusimisut iluseqartoq akuerineqassasoq ataatsimiititaliap inassutigaa.

Taama oqaaseqarluni isumaliutissiissummilu oqaatigineqartutut paasinnilluni siunnersuut ataatsimiititaliap aappassaaniigassanngortippaa.

---

Martha Lund Olsen  
Siulittaasoq

---

Mala Høy Kuko  
Siulittaasup tullia

---

Jess Svane

---

Laura Tàunâjik

---

Debora Kleist

---

Mimi Karlsen

---

Kelly Berthelsen